

四庫全書

史部

欽定四庫全書

平定三逆方略卷二十三

康熙十五年四月甲寅

詔諸將不時奏報軍中情形

上諭兵部逆賊吳三桂死守湖南我師不能驟進相持日久頃大將軍安親王克取萍鄉直逼長沙湖南諸賊震動順承郡王既已渡江貝勒尚善等復遣舟師敗賊於洞庭又據報彛陵之賊相繼沿江而下大將

軍等切臨賊境深知情形宜乘此逆賊可敗之機不時偵探以聞安塘筆帖式未能深曉兵事據傳聞來報恐未詳確朕每懷遠慮且調遣官兵尤難遙度大將軍等其各以措置機宜及所聞見竝吳三桂見駐何所賊勢何似悉具奏聞勿得因有諭旨遂緩進兵儻有隙可進即酌量以行

乙卯

勅大將軍簡親王喇布等調兵防萍鄉

總督董衛國奏逆賊數千逼近萍鄉

上諭萍鄉為安親王進兵後路所關最重簡親王及副將軍希爾根總督董衛國等速調官兵嚴加防禦

丙辰趣將軍康親王傑書進兵

將軍貝子傅喇塔奏屢奉康親王檄趣心思惶惑是以前後語言舛誤今謂臣大負信任之意

夫復何辨但王將所答催檄之詞合并具奏以為誤王進闔之行似屬冤抑臣前駐台州時王

之前進大抵以俟破台州賊寇為言故臣一得
黃巖即遣副都統沃仲巴圖魯領兵赴王軍前
乃又云候取温州以是責臣亦何辭相抵乎
今蒙

皇上寬恩不即治臣罪惟勒期速下温州臣敢不力戰
自効但環溫皆河我兵未能前進奏入

上命康親王量留兵圍困温州親統大兵赴衢州勦滅
江山逆賊進取福建又

諭曰王貝子皆朕懿親受任討賊師克在和近覽王貝子屢次章奏似不相輯睦嗣後務同心一志合謀并力以奏膚功毋各執己見貽誤封疆負朕委任至意

臣謹按將帥和協則統師征討罔不奏功是

時傑書與傅喇塔各持意見交相瞻顧及奉旨趣行又彼此推諉奏辨

皇上念師克在和若軍主不諧必因之債事特頒

勅諭令其一志同心合謀并力然後傑書等咸思感奮

始歸於好遂各統兵前發擊敗賊衆底定浙
閩蓋

皇上所以溫綸開諭感化其心者誠深知夫成功之本
在乎將帥輯睦也

戊午

命撥京口諸處戰船赴荊州

時大將軍順承郡王勒爾錦請添戰船

上諭戰船關係重大將軍華善王之鼎其撥京口沙唬

船三十星赴荊州軍前又聞江西所造得勝船殊佳
其令總督董衛國酌發速送荊州尋又

命安徽巡撫靳輔準式督造得勝船三十艘

辛酉總督董衛國奏尚之信叛

時賊犯廣東總兵官苗之秀副將吳啓鎮遊擊
李有才等相繼叛之信陰與賊通受吳三桂招
討大將軍偽號於二月二十一日易服改旗幟
遣人守其父尚可喜第以礮擊我營倡衆作亂

鎮南將軍舒恕等遂引兵歸副都統莽依圖自
肇慶突圍出總督金光祖巡撫佟養鉅陳洪明
俱降賊

增駐守兩江兵

上諭議政王等廣東變亂江南江西俱屬可慮儻粵閩
諸賊合力來犯京口諸處江南兵單難於防禦且江
西猝有緩急自江南遣援甚便官兵不可不增前發
往大將軍圖海軍前盛京兵一千人及駐兗州每佐

領驍騎一人俱調赴江南仍發京城每佐領兵一人駐兗州其江南滿洲蒙古兵令將軍華善用平寇將軍印統之以學士薩海署副都統科爾擴岱為參贊副都統楊鳳翔以安南將軍印駐防京口其遣赴江南之兵到日聽將軍華善王之弔及參贊大臣督撫等會同整飭軍馬以待調遣尋簡親王喇布果請兵

援江西

上即命此兵抵江南養馬畢速行酌遣江西應援

命大將軍貝勒尚善分兵援長沙將軍哈爾噶齊等速
取吉安

總督董衛國奏尚之信叛變將軍舒恕額赫訥
等兵悉退還

上諭粵東之事今已如此長沙攻取不可不亟今貝勒
察尼總督蔡毓榮既還荊州其自河南發往荊州兵
可速調赴岳州到日貝勒尚善分兵自陸路趨長沙
與安親王協力進取簡親王喇布即令將軍哈爾噶

齊額楚等速取吉安與將軍舒恕等合兵勦禦閩粵
諸寇接應安親王為大兵後繼

戊辰大將軍順承郡王勒爾錦奏退兵荊州

諭旨嚴飭

三月二十七日勒爾錦等擊賊於太平街失利
退還荊州上疏請罪

上諭勒爾錦身為大將軍統領精兵征討逆賊乃抵荊
以來州邑多陷且躑躅不前以致孫延齡耿精忠等

相繼叛變徒勞我師虛糜國餉坐守三年未獲寸功
察尼身為參贊不能助大將軍勦除兇逆拓地收疆
均應解任嚴加治罪念其身在行間臨敵對壘姑留
原任立功自効以贖前愆

臣謹按當安親王之趨長沙也

皇上即料吳逆必撤諸路兵自救荆岳之間賊勢衰減
爰

命勒爾錦等乘機進勦既勒爾錦等統兵渡江賊果甚

少不能擋拒棄營遁走使我兵長驅徑前不
少稽滯則湖南諸郡可迎刃解也何意遷延
數日得太平街而不守賊自松滋來援又不
能奮擊藉稱暑熱保守荆彘遽引兵而還致
賊復據長江之險久抗我師夫以

皇上規畫神妙指授精明而勒爾錦等乃坐失事機弗
克奏績誠有負

聖明之任使矣

辛未趣大將軍貝勒尚善等分兵赴長沙

先是

上命分岳州兵赴援長沙屢

詔督趣至是尚善等奏增發官兵到岳州日須從三眼橋通城一帶赴長沙正值水漲之時經涉四河

不能無阻且萍鄉瀏陽賊衆出沒恐難驟至請以此兵悉發江西令彼處分兵赴安親王軍前上復趣之曰當安親王未取萍鄉時貝勒尚善等曾言

得每佐領兵四人即可分勦逆賊斷其餉道今安親
王既克萍鄉深入長沙已如貝勒等請增發官兵赴
岳州因命分岳州兵赴長沙乃又稱沿途水漲賊阻
難以驟至請將官兵發往江西若發往江西轉令赴
援則稽滯月日如謂水漲賊阻安親王攻破平鄉直
抵長沙沿途遂無守賊并不渡一水一路坦途而下
耶如此展轉遷延地方何日得寧貝勒尚善等其以
文到日即多發官兵由三眼橋或通城等路速赴長

沙勿得仍前遲緩以誤軍機尋尚善等奏以八旗驍
騎兵八百蒙古綠旗兵各五百令副都統阿進
泰率之於本月二十六日由通城赴長沙

戊寅

命將軍烏丹等勦禦商南賊

總督哈占奏逆賊盤踞龍駒砦及資峪鋪阻商
州商南之路邀殺商南知縣盧庶

上諭將軍烏丹席卜臣及總督哈占等會商勦賊毋致

蔓延商南與河南接壤河南巡撫總兵官等亦酌調
官兵分守邊界隘口以備不虞

平定三逆方畧卷二十三

欽定四庫全書

平定三逆方畧卷二十四

康熙十五年五月癸未

命巡撫韓世琦率兵赴長沙

大將軍安親王岳樂等奏自圍長沙以來地方
諸務無人辦理

上命巡撫韓世琦盡率標下官兵赴長沙軍前其岳州
軍需付湖南布政使安世鼎調度

命議叙綠旗有功將士

上諭兵部自逆賊變亂以來各省綠旗官兵勦禦賊寇
恢復地方戮力行間著有勞績朕心時切軫念凡以
前奉旨事平議叙者爾部逐一察明功次即行議叙
以昭朕酬庸鼓勵之意

乙酉以原任總督河道楊茂勲撫治鄖陽

助陽與秦楚豫三處接壤舊設撫治軍門居中
彈壓後因湖北湖南兩撫分轄且別設總督遂

議裁罷時叛賊楊來嘉等會合興安逆寇盤踞
鄖陽之西不時竊發督撫治所遼遠控制為難
議政王等請復設撫治以專責成

上允所請以原任河道總督楊茂勳為之設標營如巡撫
例

丁亥

詔宥河東諸堡脅從居民

提督趙良棟奏言自提督臣陳福遭變逆賊直

犯寧夏河東諸堡俱被脅從今二十餘堡一聞
招撫相繼投誠

上諭河東諸堡因堡小民稀不能禦賊一時被脅誠非
得已其概從寬宥該提督仍加意撫綏以副朕惠愛
元元至意

癸巳

勅將軍覺羅舒恕等固守南贛諸處

大將軍簡親王喇布奏粵東之韶州南雄俱已

叛變將軍舒恕額赫訥等兵退守南贛福建巡撫楊熙總兵官班達禮等亦各率所部官兵隨滿兵引還

上諭舒恕額赫訥等嚴守南安贛州梅嶺以保固江西其副都統莽依圖總督金光祖音問及平南親王尚可喜存亡並確探以聞尋總督董衛國奏南安兵餉缺乏官兵不能守今閩粵諸寇又侵犯贛屬孤

城危急

上諭贛州既危應速取吉安合兵勦賊簡親王等五檄將軍哈爾噶齊額楚提督趙賴等克取吉安會合將軍舒赫額赫納兵撲滅閩粵諸寇并檄舒恕等酌量倘可由贛州攻吉安即分兵夾攻之

乙巳大將軍圖海奏敗賊于平涼城北

圖海于是月十七日至平涼越日率官兵至城北虎山墩相視形勢賊衆萬餘突來迎戰前步後騎布列火器挨牌我兵分路進擊自己訖午

大敗賊衆斬其偽總兵二人餘賊被殺傷及墜崖死者甚衆獲馬及器仗不可勝計

戊申授提督王進寶子用予為副將

進寶奏

臣

渡河以來身多疾病長子用予賦質

雖愚尚有膽力

臣

欲令練習軍事凡遇征勦輒

俾領兵而前

臣

即將來病劇猶幸有子可以報

効

上乃擢用予為副將從其父進寶効力行間

六月甲寅調喀喇沁諸部兵

上諭議政王等今遣內大臣哈代一等侍衛阿爾尼往
兩哈喇沁兩土默特兩翁牛特敖漢奈曼四子蘇尼
特撒木占額駙郡王等十旗察閱兵馬如馬肥每
佐領調兵七八名否則止各調四名調江南兵援江

西

大將軍簡親王喇布奏南安變亂將軍舒恕等
兵棄城却數十里南昌兵少有事無可調發

上命駐防池州每佐領滿兵一名將軍華善遣才能夸
蘭大一人領之江寧蒙古兵七百名令署副都統額
思赫領之俱赴江西尋簡親王喇布又奏攻取吉安
非紅衣礮不可請

勅江南總督選攻城大礮十具速運軍前并請先發江
南附近兵以濟江西目前之急

上諭調江南兵援江西已有前旨今復調每佐領兵一
名前往此二隊兵到日聽大將軍等公議相地緩急

便宜調遣其攻城大礮移文總督阿席熙等速行遣
發

遣郎中溫岱等閱視軍情

時湖廣大兵與賊相持

上因命戶部郎中溫岱往長沙兵部郎中麻爾圖往荆
州刑部郎中色度往岳州閱視軍中情形

面諭之曰爾等各往所遣地方詳閱大將軍官兵及賊
中形勢所有民情速行來奏

丙辰

命大將軍簡親王喇布等移鎮袁州

總督董衛國奏自淶口至唐山水路賊船不時出犯復有孫延齡賊船七十餘自衡州來泊於蒼頭鋪且遣賊三千侵犯攸縣

上諭逆賊知安親王進取長沙欲斷大兵後路窺伺袁州亦未可定江西既發有江南大兵省城又有總督駐守簡親王喇布副將軍希爾根其以文到日即撤

無事地方官兵赴袁州鎮守勦禦賊寇

癸亥

勅巡撫靳輔造烏船送岳州

大將軍貝勒尚善奏江西所送得勝船不宜於岳州請易為烏船

上諭尚善受大將軍之任不務速破逆賊每生事端虛糜歲月宜不允所請嚴行處治但今與賊對壘可令安徽巡撫靳輔速造烏船十艘解赴岳州

戊辰

命大將軍貝勒尚善遣兵援江西

上諭兵部近覽大將軍簡親王喇布總督董衛國等奏
尚之信背恩反叛逆賊孫延齡馬雄等分路來寇江
西袁州諸處閩賊亦乘機侵犯江西吳三桂部下逆
賊高大節死守吉安大兵尚未克復等語見今江西
兵力單弱分布勦禦防守地方又欲接應大將軍安
親王兵實難支應前貝勒尚善請分岳州兵遣發江

西謂大有裨益今阿晉泰韓世琦雖往長沙然京師所發每佐領四名兵見已抵岳尚善等合計官兵量留防守其餘官兵於文到日盡發赴江西并嚴飭領兵官兼程速往尋尚善奏自河南來每佐領兵一名更益以盛京兵及外藩蒙古兵共一千名令署副都統尼雅漢率赴江西

庚午

赦和碩額駙尚之隆等罪

尚之信既叛其弟和碩額駙尚之隆率子弟赴
部請罪

上以尚可喜矢志勤勞悉宥之隆等罪所屬人員俱從
寬免

壬申

命副都統錫三等領兵赴江西

內大臣哈代等發四子蘇尼持兵五百餘名將
至張家口

上命遣此兵赴大同調太原員外郎瑚思哈領之郎中
瑚什巴領大同兵五百名如太原并率太原兵五百
名先往河南發京城每佐領驍騎二名烏拉寧古塔
兵一千名悉改為護軍以副都統錫三統之率赴河
南并統瑚什巴兵偕往江西多諾為署副都統同赴
軍前効力圖功其兗州每佐領兵一名亦調往江西
將軍布顏仍留駐兗尋又

諭兵部曰副都統錫三署副都統多諾等所領甲兵皆

係精銳以此破賊定可成功爾部即移文大將軍王副將軍等知悉務令全軍制敵勿分其勢倘萬不得已必需分遣則酌量以行

戊寅大將軍圖海奏王輔臣降

先是圖海奏大敗賊衆於平涼即遣劄委參議道周昌入城招王輔臣輔臣隨遣其副將謝天恩來乞降

上降詔赦之至是圖海奏本月初六日

赦詔一到臣即令周昌等賫入城中次日輔臣遣偽布政使龔榮遇等率士民詣軍門納軍民冊又遣其子繼楨及偽總兵蔡元等上所受吳逆偽勅偽平遠大將軍印陝西東路總管將軍印及諸偽劄臣見輔臣尚懷疑懼於十三日復遣周昌并臣姪前鋒侍衛保定溫言開諭輔臣於十五日即至臣營叩頭謝

恩遂入城雜髮率衆來降固原偽巡撫陳彭慶陽偽總

兵周揚名下峪關偽總兵王好問關山偽副將
孔印雄及雲南土司總兵陸道清等各率所屬
官兵相繼來降

上諭圖海曰卿恭承簡命秉鉞臨邊宣布恩威勦撫並
用平涼一帶旬日綏平具見籌畫周詳布置神速克
副委用立奏膚功朕心深為嘉悅著從優議叙有功
人員一併議叙王輔臣既感戴國恩悔罪投誠著復
其原官加太子太保擢靖寇將軍立功贖罪部下官

弁照銜給與劄付兵民酌量安插

臣謹按方王輔臣之初叛也

上即命大將軍貝勒洞鄂率師掃蕩洞鄂輒逗遛不進

繼

詔旨頻趣仍因循歲月致賊偷息平涼我師疲老

皇上念平涼不下秦省未能驟定大學士圖海曾征察

哈爾有功知其智勇足以破賊乃授撫遠大

將軍使專征焉圖海密受方畧甫抵平涼即

敗輔臣於城北因其窮蹙遂宣

皇上不殺之仁遣使降之旬日之間收復平涼諸處於
是賊黨解散全秦悉定是皆

皇上知人善任制勝廟堂所致也

己卯

命發探苗官兵還雲南

大將軍圖海奏平涼投誠探苗官兵祈請遣還
故籍願捐軀報効

上諭探苗官兵若留內地恐其父母妻子或被逆賊殘害其官員各加一級兵丁酌量賞賚俱發回雲南并曉諭令各於原籍招撫從賊人民倘立功績准與優叙

臣謹按探苗官兵本係吳逆遣往平涼為賊應援及是窮迫無歸乃始隨衆來投此即概行誅殛未為不可而我

皇上念加之刑戮不若放遣以收脅附之心既曲全其

軀命且憫念其家屬咸加恩賚縱還滇中是
誠踰格之恩出於猺苗之望外者也迨後大
兵入滇所在猺苗皆仰慕

皇仁或輸饋糧糗以資我軍或鄉導前驅并力殺賊無
不傾心歸順効力抒誠蓋因

德意深遠仁澤汪濊故能使絕徼之人咸感化悅服也
命總兵官陸道清等前往湖南招撫逆賊

時署都統烏丹奏事至京向議政王等言土司

總兵官陸道清原任提標叅將黃九疇劄授叅議道周昌俱願赴賊地招撫逆賊議政王等以聞上命優加陸道清為左都督兼太子少保黃九疇周昌俱為布政使遣往湖南招撫

命大將軍康親王傑書等乘機進剿閩賊

大將軍簡親王喇布奏本月初六日偽將軍耿繼善焚燬營壘并建昌新城諸賊踰關遁走上諭耿精忠撤回建昌諸賊必閩中有變其為海寇所

逼無疑乘此機會大兵即宜前進大將軍康親王傑
書將軍貝子傅喇塔賴塔總督李之芳等速行進兵隨
宜勦撫以靖閩逆勿得坐失事機

平定三逆方畧卷二十四

欽定四庫全書

平定三逆方畧卷二十五

康熙十五年七月辛巳朔

命巡撫韓世琦督造戰艦

大將軍安親王岳樂奏賊船集長沙城下我兵
無戰艦難以破賊請發江西得勝船十艘安慶九
江沙船五六十艘赴長沙又長沙附近林木頗
多并乞

勅巡撫韓世琦伐木造船

上諭得勝船僅可用之湖中非長江所宜其岳州沙船
如安親王所請之數發往長沙江西總督董衛國巡
撫佟國禎等仍辦料募工送赴長沙軍前繕治舟艦
如不給用江南總督阿席熙安徽巡撫靳輔等速行
採辦雇募轉送江西一并運致仍預檄安親王遣兵
迎取付韓世琦督造

申飭大將軍簡親王喇布等

時賊據吉安將軍哈爾噶齊額楚等分布官兵
水陸進勦五月二十六日擊敗逆賊克其外城
追至城下斬首甚多哈爾噶齊等遣署前鋒參
領郭濟奏捷

上命郭濟傳

諭喇布等曰江西雖距京四千里朕朝夕聞之甚悉王
以宗室懿親不乃心國家惟坐守省會日事騎射不
思經理軍務恢復疆土諉避偷安殊負倚任之意今

逆賊高大節竊踞吉安諭旨到日即宜刻期攻取又副將軍希爾根不思報國日惟晏坐省城安逸日便性尤偏執軍中每言及左右翼必庇右翼嗣後宜痛改前非力圖報効哈爾噶齊額楚亦遵朕命速取吉安勿得退諉坐失機宜況覺羅舒恕莽依圖穆成額見駐贛州南安王等宜令協力攻取吉安進兵兩粵凡行兵之道愛民為先若百姓富足糧餉充裕則徵調師徒不致困乏自今大兵所至務禁戢擾掠以稱

朕撫輯兆民至意

乙酉

命鄂爾多斯兵駐邊外候調

大將軍圖海奏將軍畢力克圖報所調鄂爾多斯兵僅千人馬又羸瘦令進內地未必有益

臣

因移會畢力克圖令鄂爾多斯兵暫駐邊外養馬以待今平慶諸路雖已底定川逆尚未殄滅已令彼即率副都統恰塔兵員外郎拉篤祐所

部土默特兵及副將來他綠旂兵速赴

臣軍

上諭鄂爾多斯兵暫駐邊外秣馬署副都統額業圖會
同鄂爾多斯王等選擇甲兵補給馬甲軍械聽候調
選

壬辰

命誅參將熊虎等宣諭寧夏官兵

提督趙良棟奏

臣

按問謀害原任提督陳福者

參將熊虎等四人實為首惡今撥兵拘禁伏候

勅旨

上諭吳逆背叛以來潛布偽書煽惑人心原任提督陳福妻子在蜀初無瞻顧篤志忠貞勦禦賊寇恢復城郭功效懋著及率兵進勦固原中途遇害前因變出倉卒弁兵不能救護俱釋不問至於倡謀為亂手刃主將者國法難寬今既察明熊虎等四人實屬首惡可即正刑誅用懲奸宄其餘兵弁各守汛地無或牽連嗣今如更有首告者即以其罪罪之其徧諭寧夏

提標官兵咸使聞悉

丙申

命蒙古兵分駐河南兗州

時翁牛特喀喇沁等分八旂兵共一千五百餘人已奉調進古北諸口

上諭翁牛特等四旂兵往駐河南府喀喇沁等四旂兵往駐兗州府

丁未

諭駐防河南府參領瑚什巴等勦永寧賊

時土寇張成武侵擾河南永寧縣境駐劄河南
府參領瑚什巴等移會巡撫進兵報至

上責之曰大兵駐防河南府本為撲勦盜賊今永寧有
警瑚什巴額勒布等距賊百八十里不率兵星赴乃
稱移會巡撫遷延時日殊屬不合瑚什巴等可即率
官兵進擊該撫鎮亦即遣兵會勦無使滋蔓仍禁戢
軍士勿擾地方

戊申大將軍圖海奏官兵敗賊於牡丹園

六月二十六日偽將軍吳之茂自秦州率衆潛
逸將軍佛尼勒等以滿漢官兵追及於牡丹園
大敗之斬首五千餘級之茂率十餘騎越山而
遁

己酉

命赦江西脅從人民

上諭兵部吉安一郡逆賊盤踞日久小民被脅蓄髮者

衆此實畏死之恒情也且勞師討賊本以為民若大
兵所至蓄髮者概行誅戮殊非朕撫恤殘黎至意儻
有據守城池山寨執持兵械抗拒不降者仍行誅勦
其餘概與免死俾得自新爾部通行曉諭各將軍一
體遵行

命郎中溫岱自江西以造船貲費運送長沙

先是遣溫岱至長沙相視軍中情形及還京奏
稱大將軍安親王岳樂等請發戰艦至岳州彼

即遣官兵取赴長沙應用

上諭長沙江路窄狹逆賊兩岸踞守汴流數百里取船
不易且安親王及溫岱等前奏長沙附近堪用材木
頗多與其乘險運致不如就近採造可令溫岱速往
江西同偏沅巡撫韓世琦動支額銀二十萬兩運至
長沙為槁兵造船之用沿途令大將軍簡親王總督
董衛國等撥兵護送如江西兵力分散難以轉運移
文安親王發卒迎取其造船所需工料溫岱亦會同

江西督撫採募携往

八月甲寅

戒諭諸路將帥及文武各官

上諭吏戶兵三部比年以來大兵諸路征勦軍需浩繁一切供應皆取給於民凡領兵將軍及督撫文武大小各官俱當以國計生民為念潔已奉公加意撙節表率屬官恪遵法紀以副朕戡亂救民之意乃有不以勦寇安民平定地方為念惟圖營私射利糜費錢

糧軍前所用米豆草束諸項自將軍以下有自行販賣囑託地方官多取價值地方官有徇其情面浮冒開銷者亦有地方官販買支放多行開銷者有已備本色不行收納折價入已者有民間運到米豆草束地方官故意遲延措勒及至軍前又多方留難解官恣意需索方肯收納者至於購買馬匹不開實價以少為多濫行銷筭種種情弊難以枚舉皆由大小各官互為徇庇止知圖便已私殊為不合應嚴加禁飭以

清積弊若仍不悛改事覺照貪官例治罪有能舉首者從優議叙議政王貝勒大臣等其會同詳加定議以聞於是議政王等議定處分叙錄條例奏請

上從之令通行曉諭

大將軍圖海奏官兵復禮縣

先是賊渠偽將軍王屏藩率衆踞樂門圖海遣將軍穆占斷賊餉道穆占於六月二十七日抵樂門賊已遁去因趣兵會都統赫業副都統希

福於崖城進拔禮縣分道追賊斬首甚多

乙卯

命將軍侯張勇嚴飭邊防

勇奏彝人滾布窺我兵調征河東乘隙入內地
收掠番族人畜

上諭彝人率衆潛入內地其心叵測將軍侯張勇其嚴
飭甘涼沿邊將弁加意防守

戊午

命大將軍簡親王喇布等速取吉安接濟贛州諸軍
先是喇布奏將軍舒恕等報稱駐守肇慶署副
都統莽依圖等於六月初九日抵軍前士卒鎧
仗耗敝馬匹缺乏

上諭鎧仗馬匹皆大兵急需其令江南江西總督多備
弓矢江西巡撫動支額銀製造甲冑俱存貯南昌令
大將軍簡親王副將軍希爾根率兵速取吉安通贛
州路以所貯甲冑弓矢運至舒恕軍前仍令理藩院

傳示外藩蒙古諸王以下酌量捐助馬匹以濟軍需

尋又

諭議政王等曰大將軍簡親王副將軍希爾根等俱有保固江省勦滅賊寇重責豈得各分疆界互相推諉今將軍舒恕等兵至贛州南康為日已久馬匹資仗乏絕如聽其因糧自給必致擾害生民吉安雖未恢復豈無間道可通贛州王將軍總督等多撥官兵由間道運送糧械接濟士卒吉安既係南康贛州孔道

大將軍王等率兵速行攻取仍酌留官兵同總督董
衛國鎮守南昌

已未

諭大將軍安親王岳樂勦撫機宜

上諭岳樂曰朕聞王恢復萍鄉大創逆賊直抵長沙甚
為嘉悅今日之事利在神速若稍遲緩俾賊得固守
則攻取不易今陝西全定逆賊十餘萬自四州來者
盡已殲滅大兵即不下四川賊亦不敢復出若發見

在陝西之兵前赴湖廣庶或有濟王其善撫百姓儻
民困已極即得地方亦復何益至叛變之人皆係脅
從情非得已且原皆朕之臣子王其時加招徠即吳
三桂果有輸誠之心亦何不可納之有王膺此重任
自有成算特以朕意示知

臣謹按帝王之用兵也將以勤恤民隱而除
其害故師有容民之像而武以止戈為文聖
人靖亂安人之意蓋今古如一也當茲六軍

南討進抵長沙

皇上念切烝黎汲汲焉欲出之於湯火因

趣岳樂速行政取又特申

天語令其善撫百姓且謂脅從之人皆我臣子宜加招徠誕播並生之德丕彰不殺之仁仰見我

皇上之心一天地之心大哉其無所不覆載也已

已已

命陝西提督王進寶等駐固原諸處

大將軍圖海奏陝西提督本駐平涼固原密邇
平涼且為秦中形勝之區應令王進寶移駐固
原兼理固鎮事務其西寧為邊陲重地距固原
甚遠進寶難於遙制固原總兵官朱衣客向在
西寧熟諳形勢調駐西寧於邊陲殊有裨益又
慶陽一郡幅輳遼濶素為賊藪當此反側初安
亟需彈壓宜令隨征總兵官陳奇謨暫鎮慶陽
安輯人心

上允之

乙亥總督李之芳奏官兵殲賊于大溪灘

時偽將軍馬九玉等率賊衆數萬人據守衢州
河西賊將林福營於大溪灘輓運糧餉大將軍
康親王傑書承

詔進兵衢州集都統賴塔等議先斷賊餉道以奪賊勢
遣賴塔等於是月十五日率滿漢官兵直抵大
溪灘奮擊大敗之乘勝進取江山縣城九玉大

懼棄營遁走

丙子封大將軍圖海公爵

上諭吏兵二部曰撫遠大將軍都統大學士圖海器識
老成才猷練達贊襄機務宣力累朝以文武之長才
無忠愛之至性勞績茂著倚毗良殷前察哈爾布爾
尼背恩反叛命圖海為副將軍帥兵征勦運籌決勝
克振軍威未及一月捷功立奏逆賊殲滅疆圉敦寧
近以平涼阻兵日久屢命勦撫罔有成效特簡圖海

為將軍統率大軍節制各路果爾謀畧淵深調度得
宜軍鋒所至一戰克捷更能體朕好生之心宣布恩
威開誠招撫遂使平涼慶陽固原諸處文武官員兵
民傾心向化悔罪歸誠生靈免於塗炭邊境賴以保
安數日之間關隴悉定皆由籌畫周詳布置神速勤
撫並用克建膚功圖海以心膺大臣膺秉鉞重寄實
心為國克副倚任朕心深為嘉悅於軍功議叙外應
從優加恩封為三等公以示朕眷注忠勤酬答勲庸

至意

加將軍侯張勇等秩

上諭兵部自逆賊煽亂以來奸徒附和侵擾地方閩隴以西疆域遼濶大兵一時未集人心不無動搖靖逆將軍靖逆侯張勇提督王進寶總兵官孫思克一聞蘭州之變即帥兵星馳渡河勦禦收復城邑條奏機宜舉發偽劄緝獲奸謀綏定邊陲厥功甚大及大兵攻取平涼專任靖逆侯張勇等鎮守秦鞏復殫心籌

畫調度合宜勦禦川賊屢奏捷音紓朕西顧之憂功
尤茂著伊等皆宿將重臣矢志報國同心協力展布
謀猷兼以訓練士卒忠義素孚故能身先行陣所向
克捷其所屬將卒亦皆効力共建功績朕甚嘉之於
軍功議叙之外應從優加恩以示朕獎勵忠貞酬答
勲勞至意張勇加為一等侯王進寶陞為一等阿思
哈尼哈番授為將軍仍兼管平涼等處提督事務孫
思克陞為一等阿達哈哈番涼州提督

戊寅

命副都統瑪哈達為鎮守杭州等處將軍

先是杭州將軍圖喇告病

上令其還京以副都統瑪哈達暫為署理至是兵部以
應補之副都統等列名具奏

上乃命瑪哈達為鎮守杭州等處將軍

平定三逆方畧卷二十五

欽定四庫全書

史部

平定三逆方畧卷

二十六至
三十

詳校官編修臣曹振鏞

編修臣裴謙履勛

總校官候補中書臣潘有為

校對官中書臣李斯咏

謄錄監生臣邵延曾

平定三邊方略卷二十六

康熙十五年九月庚辰朔總督李之芳奏克仙霞

關

時馬九玉敗遁大將軍康親王傑書遣副都統

瑚圖等率兵連夜追擊破之克常山縣又遣將

軍賴塔副都統瑪哈達等於八月二十日進至

仙霞關分路攻翼日偽參將金應虎等獻關

迎降官軍長驅而進二十三日抵浦城縣攻拔之

臣

謹按閩逆阻兵首尾三載所以苟延喙息

未服天誅者徒以仙霞之險也先是建昌諸路賊衆退回諸將猶為持重之計頓兵不進皇上即知閩有內亂趣傑書赴衢約勒士馬尅期進討未幾遂有大溪灘之捷至是而仙霞不守枕席過師精忠麋身自歸八閩以次底定

睿謨深遠決策如神史冊所載未之有也

辛巳

命遣馬承先等赴粵西招撫馬雄

先是大將軍公圖海奏原任廣西提督馬雄之母及孀人俱在固原今雄母欲令其孫承先承霄等持書赴廣西招雄歸降

上令承先等馳驛來京至是至京師

上命給馬承先等遊擊銜劄選賢能筆帖式一員同行
赴大將軍簡親王副將軍希爾根總督董衛國軍前

到日共議送承先等於將軍舒恕所轉送廣西若不能達舒恕軍可覓間道遣赴馬雄處承先等前往宜有符驗令錄馬雄披陳原疏持以為信

癸未

勅大將軍簡親王喇布等攻醴陵

喇布奏醴陵陷賊袁州萍鄉雖有署副都統揚古岱等統兵駐守其力頗單南昌兵卒分撥應援外止存甲士五十人別無可調之兵臣已檄

揚古岱等固守袁州諸處聞署副都統多諾兵
駐廬州養馬並檄趣馳赴江西

上諭袁州鎮標近已增設多兵署副都統揚古岱又率
兵駐防兵力亦不為少醴陵乃大將軍安親王大兵
後路今既陷賊宜急圖收復大將軍簡親王等其速
趣揚古岱及總兵官趙應奎等分遣官兵迅取醴陵
并間道移會安親王發兵夾攻更檄署副都統多諾
副都統席山等星夜馳赴江西聽簡親王調度

丁酉

諭大將軍康親王傑書招撫耿精忠

上諭兵部曰大將軍康親王統率大兵大敗賊衆已入閩境耿精忠雖背恩反叛念小民遭罹賊亂困苦已極朕心深為惻然其以時事曉諭精忠早降以副朕安輯生民至意

諭湖廣總督蔡毓榮等轉餉鄖陽

撫治楊茂勲奏賊渠譚洪由水陸來犯欲斷餉

道臣與防守均州副都統諾敏柯彝等共議發
臣標兵併均州滿漢官兵分四隊以禦來援賊衆
惟慮餉道一時難通遲延時日糧匱可虞

上諭糧餉係大兵急需楊茂勳諾敏等協力勦賊速通
水路湖廣督撫仍設法陸運至鄖毋至匱乏

戊戌

命江南江西將軍總督遣兵夾勦徽饒諸路餘賊

浙江總督李之芳奏賊帥馬九玉敗走餘賊四

竄潛匿尚多馬鵬等擁衆屯踞新建諸處地連
徽饒廣信不可任其蔓延

上諭大將軍康親王已統帥大兵大創逆賊深入閩境
宜及此時掃除餘賊平定地方大將軍簡親王副將
軍希爾根江西總督董衛國將軍華善江南總督阿
席熙等其速檄駐守建昌署副都統尼滿駐守徽州
署副都統岳爾多等各率兵前進協勦徽饒廣信接
壤諸寇務行撲滅以張浙閩大兵聲勢

丙午

命署前鋒統領穆占為征南將軍帥師赴湖廣

先是大將軍公圖海奏今進取漢中必滿漢兵
并力庶可有濟但大兵征勦逆賊二載有餘軍
械殘敝綠旗兵丁馬已殆盡且秦地人民頻年
勞困已極是以臣等公議暫停進攻漢中之役
分兵防守諸隘餘兵每佐領撥足五人每翼設
參蘭大二員遣副都統希福領之前赴湖廣俟

秦中兵民稍得息肩整繕器械儲備糧糗再相
機進取

上諭賊渠吳三桂竊踞湖南為日已久宜速遣重兵赴
湖廣掃除逆賊克復疆土若止遣每佐領兵五人恐
力仍未足今大將軍公圖海既招撫王輔臣底定平
涼諸處可暫停進取漢中量留官兵防守隘口餘兵
內簡擇精銳仍携大將軍敕印率赴湖廣勦滅逆賊
至是圖海又奏平涼慶陽雖已底定而投誠兵

心尚未寧靖雖遣兵防守諸隘漢中興安尚未
恢復臣若率精銳赴楚恐不逞之徒心懷叵測
上諭大將軍公圖海既稱新附兵心未靖漢中興安尚
未恢復可勿赴湖廣署前鋒統領穆占懋著勤勞其
實授都統佩征南將軍印統率原撥陝西每佐領騎
兵五人益以每佐領護軍二人簡新附總兵王好問
等所屬精兵二千人併見在湖南瑚什巴等所率每
佐領兵一人俱付穆占統領前赴湖廣陝西所有諸

將不論參贊與否俱聽穆占會同圖海公議簡擇以
往抵湖廣日於荊州岳州彛陵諸處滿兵及伊所統
兵內共選官員及前鋒護軍騎兵每佐領足十人或
從荊州渡江或由彛陵進勦或趨岳州水陸夾攻聽
相機從事如須用湖廣綠旗官兵亦令隨宜携往

丁未大將軍康親王傑書奏官兵復建寧

將軍賴塔率滿漢兵自浦城星馳前進於是月
初三日抵建陽縣擊敗賊衆斬殺甚多遂克其

城進至建寧府賊潰走府城亦復

十月辛酉提督佟國瑤奏敗賊於鄖陽

八月川賊譚洪率衆乘船順流而下圍困鄖城
將軍噶爾漢提督佟國瑤等出兵邀戰敗之陡
嶺九月十九日復以水陸兵分路夾擊斬首甚
多餘賊悉遁

癸亥

命叙賚甘肅鎮將士

上諭兵部自逆賊變亂以來總兵官孫思克標下將士
用命屢經戰陣勞苦可嘉所司速行叙賚以示鼓勵
庚午總督李之芳奏復溫州

浙江溫州總兵官陳世凱平陽總兵官王廷梅
等遣兵分路復浙閩江西接壤諸縣溫州偽都
統曾養性偽伯祖宏勳等聞大兵入閩勢迫無
歸是月朔日率衆以城降浙土皆定

壬申

諭將軍穆占進兵機宜

穆占奏防守陝西各隘外所餘滿漢兵若令大將軍公圖海等及臣率赴湖廣更酌選荊州岳州彝陵兵分路並進則吳逆可滅若欲進漢中興宜宜停發陝西滿漢官兵令圖海及臣率之四路進取四川雲南吳三桂勢必退保巢穴則湖南地方亦易恢復

上諭陝西兵所在征勦勤勞備至輓輸糧餉民殊苦累

若復進取四川恐師徒重困轉運維難故暫停漢興之役平涼雖已底定綠旗兵既乏馬匹新附之衆心猶未定陝西諸將及新附將士不便調往湖廣且荆岳諸處有大將軍順承郡王貝勒尚善都統鄂爾宜禮布等統兵駐守又大將軍安親王統率大兵圍困長沙今將軍穆占率師抵湖廣日合荊州諸處兵每佐領配足十人又添蒙古兵及陝西湖廣綠旗兵隨往兵力不為單弱著穆占仍遵前旨行迨克復地方

其應設鎮守官兵調遣機宜與諸將軍總督提督等
議行大將軍安親王順承郡王貝勒等探知穆占何
路進兵即相機應援大兵勦賊惟馬是賴可視其肥
瘠擇可整駐之處酌量餉秣尋又

召穆占來京密授機宜隨令馳往軍前

召還駐守河南府及潼關兵

上諭兵部曰駐守河南府及潼關兵回自保寧備嘗艱
險俱召還京師大將軍公圖海可分兵守潼關將軍

布顏盡率兗州駐防兵移鎮河南今閩浙俱已底定
兗州不必駐防又

諭還自保寧官兵曰逆賊吳三桂負恩反叛大兵致討
爾等為國盡勞攻取七盤朝天諸關大敗賊衆直抵
保寧屯駐日久餉道梗塞遂爾旋師未獲成功責在
將帥非爾等之罪沿途遇賊復同心合力屢次血戰
擊敗賊衆後又久圍秦州屢敗四川來援之賊恢復
秦州又擊敗平涼諸賊降王輔臣爾等披堅執銳二

年有餘勦寇開疆備嘗勞苦朕心憫焉今據塘報耿
精忠已歸命關陝閩浙以次削平江西不日底定粵
賊亦已敗走爾等於更替官兵到日即速還京所有
勞績俱與議叙

平定三逆方畧卷二十六

欽定四庫全書

平定三逆方畧卷二十七

康熙十五年十一月乙酉大將軍康親王傑書奏
耿精忠降

傑書帥師抵延平偽將軍耿繼美等以城降精
忠探知大懼隨遣其精奇尼哈番劉蘊祥等赴
延平獻偽總統將軍印續遣子顯祚來迎傑書
師抵福州令侍讀學士尹泰賈免死

勅諭以往精忠於十月初四日率偽文武官出城迎降
獻所屬官兵冊籍尋精忠請隨大兵立功贖罪

傑書以

聞

上命精忠仍留靖南王爵率伊屬官兵隨大兵征勦海
逆圖功贖罪原任巡撫劉秉政等俱著來京其藩下
官及兩鎮標下武職仍留原任兵丁照額設外其餘
願効力者分隸提鎮各標願歸農者原籍安插

丙戌

命京口將軍楊鳳翔等率師赴福建

上諭議政王等曰大將軍廉親王帥師定閩進勦海寇
分兵守福州諸處恐兵力未足可於駐守江寧盛京
兵內發七百人自京發往京口漢軍兵內發五百人
令將軍楊鳳翔署副都統岳爾多孟安等率赴大將
軍軍前聽其調遣又聞進閩大兵缺馬即發內廐及
兵部驛營馬共二千選八旗官各一員送軍前散給

其送馬官沿途或有騷擾許地方官指名叅奏

大將軍康親王傑書奏官兵敗海賊於烏龍江南
海賊偽總統許耀率賊三萬餘逼福州烏龍江
南而陣列十餘營都統拉哈達率兵進攻十月
十五日渡江分隊奮擊敗之於小門真鳳諸山
盡破賊營追奔四十餘里

丁亥

勅諭湖廣大將軍王貝勒大臣及諸將士

上諭湖廣大將軍王貝勒叅贊大臣及官兵曰我朝創
業以來凡滅寇開疆動合機宜將帥皆身先士卒無
不膚功立奏逆賊吳三桂背恩反叛朕念爾等宗室
大臣簡閱官兵委以南征削平僭亂拯救生民今出
師三年未獲尺寸坐失機會使疆圉日逼賊勢鷓張
糜餉困民悞國孰甚罪在王貝勒將軍大臣於衆官
兵無與今陝西福建江西浙江雖漸底定然賊渠三
桂不誅於事何濟日者穆占在川陝時勞績茂著茲

特簡為征南將軍命之討賊爾等亦當同心戮力殲
寇拓疆以副朕靖亂安民之意慎勿妄分疆界各顧
部伍互相推諉仍蹈前失也衆官兵自遣發後為國
効力暑雨蒸濕浚濠築壘晝夜枕戈衝鋒冒刃分防
偵探備極勞苦朕悉知之每念及此深用惻然爾衆
官兵其念朕卹養之恩益加用命儻樹立功勲朕不
吝優加爵賞其各勉之又

諭理藩院覽大將軍順承郡王奏蒙古兵丁抵荆日久

馬匹倒斃甚多其以見在外藩王貝勒等所獻之馬撥足一千九百匹速行前往用資征剿

辛卯

命大將軍簡親王喇布等調兵剿醴陵萍鄉賊

總督董衛國奏臣偵知醴陵陷賊隨啟大將軍簡親王遣副都統錫三領兵赴援今賊復聲言犯萍鄉諸處臣思瀏陽醴陵皆前通長沙乃江楚門戶今為賊據誠恐安親王孤軍深入又無

援師深屬可慮

上諭醴陵萍鄉為安親王大軍後路所關匪細副都統
錫三雖已赴袁州仍恐兵力單薄今閩省已定建昌
諸處似可稍舒大將軍簡親王及副將軍希爾根總
督董衛國等量調建昌撫州樂平饒州南昌諸處滿
漢官兵速赴袁州萍鄉諸處同錫三楊古岱趙應奎
等協力勦賊疏通道路仍間道移會安親王若可發
長沙兵量行速發夾勦

丙申

命將軍穆占援長沙

先是大將軍安親王岳樂赴長沙

上以我軍深入滑賊吳三桂必往來救援

勅大將軍順承郡王勒爾錦貝勒尚善等揚聲進兵以牽其勢不時偵探賊情相機渡江進取至是總督董衛國巡撫韓世琦總兵官趙應奎等相繼奏言三桂知長沙被圍即遣馬寶高啓隆由岳

州星馳救應又遣偽將軍胡國柱等入長沙固守三桂亦自松滋擁衆來援長沙屯嶽麓山

上諭荆岳大將軍等違命不前遲延時日致逆賊得間四出應援今荆岳之兵安處日久馬皆肥壯著將軍穆占速赴湖廣簡選荆岳彝陵士馬由岳州趨長沙接應安親王兵若長沙軍無虞或出彝陵或取岳州或由荊州渡江便宜進發

壬寅趣諸將取吉安

先是總督董衛國奏醴陵陷賊萍鄉危急

上諭將軍哈爾噶齊額楚等抵吉安數月不能剿除逆賊攻克城池故逆賊乘間陷醴陵窺萍鄉恣意肆逞覬斷安親王大兵後路及提督趙賴等領兵赴援又不能奮力協勦玩日愒時以致餉糜師老徒擁重兵惟務安居殊悞大事且屢撤簡親王喇布副將軍希爾根令其親統大師速赴吉安乃藉口南昌重地逗遛不前及屢次催趣始行進發又不多備礮藥鉛子

等物至吉安始言火藥不敷遣人索取即此觀之顯
誤大事喇布等其速攻吉安繼安親王大兵後路應
援醴陵至是簡親王喇布等奏稱省城及撫州樂平
諸要地汎兵單弱總督董衛國又以上高奉新
諸處賊氛蜂起求發援師請調隣省附近之兵
前來防守

上諭各路調集江西兵為數不少簡親王喇布等不速
取吉安徒爾勞師糜餉吉安一郡尚不能取湖南逆

賊何日得平前理藩院郎中瑚什巴所領蒙古兵已
遣赴江西董衛國又身在省城鄰省之兵無庸調遣
至恢復長沙平定湖南皆賴吉安大兵接應簡親王
喇布副將軍希爾根將軍哈爾噶齊額楚等仍遵前
旨速取吉安若更遷延觀望安親王大軍脫有疎虞
喇布等俱照坐失軍機例從重治罪決不輕恕

癸卯

命募補福建提鎮標兵如原額

先是大兵赴閩提督段應舉請選調內地精兵
隸其麾下以資勦禦

上命應舉與大將軍康親王總督李之芳會酌調浙江
綠旗兵以往至是大兵已抵閩

上諭今大將軍康親王已抵閩中勦除海寇正需兵力
該提督及隨征總兵官標兵均如原額募補

十二月壬子

命左都御史介山等赴福建叅贊軍務

大將軍康親王傑書奏臣率大兵平定閩疆諸
凡諮謀軍務及分兵留守事宜不得不請增叅
贊之臣乞

皇上遣在京大臣二三人前來叅贊又靖南王耿精忠
見隨大兵征勦其所部官兵家口在福州統轄
乏人乞於額駙耿昭忠聚忠二人內速遣一人
同大兵鎮守

上諭左都御史介山侍郎吳努春參贊康親王軍務以

耿昭忠為鎮平將軍駐守福州

癸丑

命大將軍公圖海遣兵與河南蒙古兵更調

將軍布顏奏臣所統兵八百人俱繫蒙古難於
應機調遣請發滿兵令臣兼轄以資戰守

上諭將軍布顏所統兵丁俱繫蒙古遇有緊急軍務恐
致稽延見在陝西兵數頗衆大將軍公圖海於滿洲
漢軍兵內酌發四百赴河南府令布顏統之河南府

所有蒙古兵分發四百人令理藩院員外郎頗羅色
率赴圖海軍前

丙辰

勅大將軍康親王傑書等進勦海寇

大將軍簡親王喇布奏偽將軍耿繼善等率賊
數萬圍困南豐海寇亦侵犯廣昌

上諭大將軍康親王傑書疏言耿精忠及閩省官兵俱
已歸降廣信諸處亦皆嚮化偽將軍等盡已調回今

江西南豐諸處耿繼善等何故乃行騷擾康親王傑
書及耿精忠察實奏聞大兵抵福州日久若不速行
進勦海寇則江西之賊勢難遽靖王等速進兵平定
興泉漳諸郡或應遣兵從汀州夾攻其相度機宜分
兵齊發

丁巳

勅諭尚之信

時之信欲降自粵東具密疏遣人賫至大將軍

簡親王喇布軍前喇布以

聞

上降勅諭之信曰昔

太祖皇帝肇造洪基爾父航海歸誠功猷茂著後命駐防
粵省平定海疆自吳逆叛亂以來益矢忠蓋多方籌
畫屢建功勳故特封爾父為親王授爾為討寇將軍
正期克奮勇畧掃除賊逆不圖粵省變亂道路梗阻
今覽爾密奏稱父子世受國恩斷不敢懷異念願立

功贖罪來迎大軍知爾父子不忘報國念篤忠貞因
事出倉卒致成變異朕心甚為惻憫今特降旨將爾
已往之罪併爾屬下官兵槩行赦免儻能相機勦賊
立功自効仍加恩優叙爾當益竭悃誠勉圖後效以
副朕始終曲全至意

戊午

命副都統烏丹等赴將軍侯張勇等軍前議進兵機宜
大將軍公圖海奏平涼慶陽雖底定漢中興安

尚為賊據臣等議於來春進討應先調綠旗官
兵提督孫思克量留兵守涼州親統官軍來秦
州將軍侯張勇遣兵二千亦赴秦州提督趙良
棟量留兵守寧夏親統官軍來鳳翔將軍王進
寶遣兵二千亦赴鳳翔俱於明年正月二十日
內如期而至

上諭調兵征勦事關重大令副都統烏丹員外郎馬爾
漢等赴張勇王進寶孫思克趙良棟等軍前調遣綠

旗官兵或如大將軍公圖海所調或作何調遣將軍
提督等孰宜親往作何前進至恢復漢興之時應駐
守其地或徑取四川逐一公同確議遣同往官員馳
驛奏聞

已未遣督捕理事官麻勒吉招撫馬雄線國安

侍郎覺羅舒恕奏總兵官黃芳世自粵東至贛
州云尚可喜已病故孫延齡為其部兵拘執抄
奪家產共推線國安為帥

上諭馬雄線國安皆曾受國厚恩國安為孫延齡逼反
雄屢疏請救因援兵不即至亦勢迫從賊今延齡既
為其部兵拘執抄奪家產宜乘彼內亂速行招撫其
招撫勅諭內閣撰擬令督部理事官麻勒吉齎赴大
將軍簡親王軍前公同商酌將勅諭抄錄遣賢能人
員持往曉諭馬雄線國安如有回音麻勒吉即以奏
聞

勅諭馬雄曰爾世受國恩勞績素著鎮守西粵綏厥巖

疆自吳三桂孫延齡二逆反叛整兵防禦力保孤城
邀執僞差矢心報國爾之忠貞朕久已洞悉後緣賊
氛逼近援絕勢單當力難拒守之時為暫爾自全之
計推原情事諒非本懷茲者各路大兵勦撫並用平
涼已經歸誠王輔臣優加將軍所屬官員兵丁照舊
錄用大將軍康親王統兵入閩耿精忠悔罪來歸仍
授王爵藩下官兵任用如故每念粵西叛變各官身
陷賊中自拔無由以爾據忠有素簡任多年追溯前

勞尤深軫惻今特頒專勅宣諭朕意爾果翻然悔悟棄逆効順將爾已往之罪并所屬官員兵丁悉行赦免照舊錄用若能勦寇立功仍行加恩從優議叙爾其勉勵忠貞無懷疑懼以負朕篤念勲舊至意

勅諭線國安曰爾初隨定南王航海來歸即授世職以爾才勇堪任補授粵西提督開闢地方勦禦賊寇著有勞績優加伯爵授為撫蠻將軍後以告老謝事孫延齡代領藩旅值吳逆叛變延齡狂悖無知被惑構

亂道路阻絕爾之聲息無聞朕心時切軫念每思定
南王捐軀為國盡節疆場藩屬官兵俱受國家豢養
効力多年必非甘心從逆况爾宿將舊勲忠貞素篤
料必感戴國恩始終不渝茲者各路大兵勦撫並用
平涼已經歸誠王輔臣優加將軍所屬官員兵丁照
舊錄用大將軍康親王統兵入閩耿精忠悔罪來歸
仍授王爵藩下官兵任用如故惟粵西一隅叛變未
寧即有忠節之士無由自拔以爾藩下舊臣衆所推

服特頒專勅宣諭朕意爾其首倡大義鼓勵羣情藩
下大小官員及兵丁人等如悔罪投誠棄逆効順已
往之罪悉行赦免照舊錄用安插若能勦寇立功仍
行加恩從優議叙爾其勉勵忠忱勿懷疑懼以負朕
篤念勲舊至意

庚申加海澄公黃芳世太子太保以黃藍為海澄
總兵官

上諭兵部曰海澄公黃芳世矢報國恩不肯從逆間闕

冒險全節來歸忠貞茂著可加太子太保鎮守漳州
黃藍屢次齎奏忠勤可加優擢為都督僉事充海澄
總兵官並令馳驛赴大將軍康親王軍前俟恢復漳
泉收集海澄公標下官兵鎮守汎地

壬戌

命送馬至長沙軍前

上諭兵部長沙軍中少馬可於每佐領下各選肥馬四
匹發往岳州量撥八旗官兵護送若將軍穆占由岳

州進取長沙則以此馬付彼同大兵帶往交大將軍
安親王若穆占不由岳州則大將軍貝勒或即撥官
兵送往或移令安親王遣兵迎取聽酌量以行

已已趣將軍穆占進兵

大將軍簡親王喇布等奏偽將軍率衆數萬來
援吉安距城二十里許總督董衛國亦奏賊自
涿口抵攸縣界聲言犯萍鄉又云往援吉安聞
賊帥馬寶等率賊三四萬已至永新安福並欲

為吉安聲援

上諭逆賊吳三桂知我荆岳大將軍等斷不進兵故身
往常德調集賊衆併力於長沙吉安將軍穆占速選
荊州士馬相機前進以分長沙吉安賊勢平定湖南
大將軍簡親王喇布等嚴飭所部保固疆圉

辛未

命裁耿精忠部下兩鎮兵

大將軍康親王傑書奏耿精忠所部除編作佐

領兵丁外又有左右兩鎮兵今福建經制兵及撫剽兵俱如原額全設精忠見率伊佐領下兵隨大兵征勦海寇未為不足今正節省糧餉之際其兩鎮官兵應請裁革又藩下總兵官曾養性及原任温州總兵官祖宏勳俱自温州率兵至福州宏勳應如劉秉政例赴京候補

上諭康親王身在地方稔悉情形請裁兩鎮官兵俱如所奏其裁退官兵設法安插務俾得所祖宏勳令赴

京師

丙子大將軍康親王傑書奏官兵復邵武

大兵抵延平偽將軍耿繼善棄城走江西海賊
遂襲邵武是月初四日副都統伯穆赫林等自
延平進兵浦塘隘口大敗海賊偽總督吳淑等
又乘勝追擊陣斬偽總兵楊大任等萬餘人初
六日偽將軍彭世勳以邵武降

平定三逆方畧卷二十七

欽定四庫全書

平定三逆方畧卷二十八

康熙十六年正月己丑調兵赴荊州

大將軍順承郡王勒爾錦奏言將軍穆占抵荊
州增撥在荊都統伯伊里布前鋒統領碩岱副
都統託代龔圖漢軍副都統祖澤純宜思孝及
滿洲漢軍邊外蒙古綠旗官兵共六十餘率赴
岳州長沙如賊覘知荊州大兵勢分乘虛侵犯

金史四庫全書 卷二十八
我兵守汎尚患力單他處有警實難應援乞調
隣近滿洲綠旗官兵移駐荊州以資防禦

上諭駐河南府滿洲漢軍蒙古兵令員外郎頗羅色統
領其自陝西遣發滿洲漢軍兵令原轄將弁統領俱
赴荊州鎮東將軍布顏暫駐懷慶

庚寅

命大將軍公圖海等分兵赴荊州

圖海等奏臣等前調綠旗官兵本擬於二月內

進取漢中興安今將軍侯張勇等咨稱宜視夏
秋收穫豐歉再圖進取但漢中興安山峻路險
延至彼時適遇靈濼賊守將益堅臣等仍欲調
兵及時進取

上諭大兵即克復漢中興安須設重兵重兵一設則運
餉維艱若俟夏秋進取又頓兵曠日虛糜糧糗今將
軍穆占方勦吳逆機不可失大將軍公圖海等暫停
漢興之役留滿洲蒙古兵一萬同綠旗兵防守秦州

諸隘分兵五千遣大臣一人統赴荊州到日順承郡
王等量留官兵防守荊州彝陵諸處乘穆占由岳州
長沙進取湖南之時相機渡江破賊尋又

諭兵部曰前陝西分兵赴荊州欲令順承郡王等乘機
渡江平定湖南今恐中途延緩爾部其檄趣進兵毋
得逗遛貽誤軍機

辛卯

命大將軍簡親王喇布等防守萍鄉醴陵

總督董衛國奏逆賊窺伺萍鄉賊渠朱君聘等
欲俟偽將軍到日即趨萬載攻瑞州犯南昌疏
入

上諭萍鄉醴陵係大將軍安親王大兵後路所關最重
其守禦機宜大將軍簡親王喇布副將軍希爾根總
督董衛國等共商酌以行

丙申遣戶部侍郎班迪等察吉安兵失利罪

大將軍簡親王喇布奏賊援吉安將軍額楚等

率兵迎戰三次失利臣等議調南昌建昌諸處
滿漢官兵俟到日即協力攻勦疏入下議政王
貝勒大臣集議議政王等議曰我

國家開創以來賞罰嚴明攻城野戰無不克捷今額
楚等官兵屢敗皆由將懦兵玩大將軍簡親王
喇布等應嚴察處分但見在勦賊俟事平日再
議其臨陣先退者即行拘禁嗣後犯者勿論官
員兵丁即于軍前正法將弁等有觀望不前者

削職仍隨大軍効用喇布既稱調取建昌諸處官兵到日即宜整頓兵馬勒絕賊援攻拔吉安將軍穆占已於本月十一日抵岳亦應速令相度機宜或攻取岳州或進勦長沙以分賊勢

上報可仍令班迪等赴吉安嚴察罪狀以聞

庚子

命大將軍簡親王喇布等速取吉安固守袁州

喇布等報來援吉安賊衆於本月初九日夜遁

上諭我兵屢戰不利賊何故遁或因將軍穆占進兵長沙聞風掣回或謀潛襲袁州俱不可料今吉安已調建昌諸處官兵簡親王喇布等宜乘機速行攻取吉安至於袁州所繫甚大宜分兵固守勿致疎虞總督董衛國其檄令總兵官趙應奎協力防禦

將軍穆占請發兵為後繼

上不許

穆占奏臣等率兵於本月二十二日由岳州赴

長沙深入賊地岳州百里界內宜發千兵防守
庶無斷後之虞

上以穆占進勦湖南既精簡荆岳之兵率之前發餘兵
單薄難以分駐不允所請尋大將軍貝勒尚善
等亦疏言兵力單少不便分發

上乃命尚善等作水陸攻戰之勢乘隙進取仍時探穆
占兵消息以聞

壬寅

命發京口戰船赴岳州

將軍穆占奏

臣抵岳州

相度形勢江湖之間非

船不濟今安徽巡撫造送沙船四十於本月十

五日到岳應再發江南荊州諸處沙船百餘艘

齊赴岳州軍前儻長沙未能即克至三四月間

臣等遣兵取船由洞庭前進或攻或圍均有攸

賴若長沙既得則安親王及臣等之兵即乘此

船水陸夾攻岳州庶乎有濟

上命京口將軍王之昂發沙唬船六十艘隨帶礮械水
手人役量配官兵護送至岳州并靳輔所送船
足百艘之數以備安親王岳樂將軍穆占取用
甲辰大將軍康親王傑書奏官兵復汀州

副都統伯穆赫林等由邵武追勦海寇於十五
年十二月初十等日抵泰寧諸處偽總兵王安
邦等率偽官兵民等降泰寧建寧寧化清流四
縣及汀州府相繼恢復

二月辛酉

詔蠲福建田租

上諭戶部閩地經海孽竊踞又遭三年變亂逆賊暴征橫斂民困已極今年租稅盡與蠲免其遭亂竄避人民俱招輯還籍俾各安本業

壬戌調安慶提督標兵赴吉安

先是侍郎班迪等赴吉安取道安慶

上令傳諭巡撫靳輔云今安慶無事吉安用兵之際提

標官兵應否就近調遣巡撫提督集議具奏至是靳
輔等議於防守池州建德及在皖提標兵內選
調一千五百人令提標遊擊周時隆等率赴吉
安其池州建德別於撫提標兵內通融調防

上報可

丙寅調都統鄂爾領兵赴岳州

先是大將軍貝勒尚善等奏言今備船百艘遣
赴長沙乞添發近地甲兵每佐領四人以壯兵

力先破賊船後遣我船進發

上諭將軍穆占兵於本月初三日已抵長沙賊勢必分順承郡王勒爾錦等宜乘此機勢陝西兵一到即行渡江儻渡江未便則如貝勒尚善所請分兵赴岳州其或分兵或渡江速議密奏以聞至尚善等前稱造換牌車輛攻取岳州繼稱水陸齊進乃觀望不前其為誑奏明甚今據報岳州賊較前大減益我兵力正可以進取之時荊州發兵到日即宜速攻儻仍遷延

時日併與前罪嚴行議處嗣勒爾錦又請發河南江南綠旗官兵

上不許令遵前旨速議具奏至是勒爾錦等兩議以聞
一議俟陝西遣發及所請綠旗兵到正值水發之時過江不能無阻今宜於每佐領四人外量行添發酌撥船艘遣赴岳州其間若有隙可乘亦即相機趨利

上諭今正勦滅吳逆時不可緩宜自岳州水陸夾攻勒爾錦等可於每佐領簡精兵五人量配船艘令都統鄂爾率赴岳州速行夾勦於是勒爾錦給鄂爾以討逆將軍印令其統領舟師前往

丁卯遣刑部郎中色度等諭岳州將士

上諭色度等爾等至岳州勞問將軍大臣滿漢官兵並宣諭云岳州長沙勢如兩足此蹶則彼不能獨立我國家禁旅徂征戰勝攻克未有如此之相持曠日者

也若都統用命於貝勒貝子將弁用命於都統兵卒
用命於將弁以次爭先指臂相効何功不成陝西官
兵戮力成功今並獲休息諸將士倘能奮勇奏効亦
與彼同獎賚官秩朕所不靳其戰守機宜令貝勒貝
子等集議以聞至長沙諸處軍情爾不時偵報俟荆
州兵到察其大勢乃歸爾色度曾至岳州熟悉地形
戰守機宜俱與貝勒等言之爾等奉使非輕兵機尤
重爾等到彼審度時勢而行倘勢處萬難勿強之使

進以悞大事未幾大將軍貝勒尚善等奏郎中色度
到岳州傳奉

諭旨集議水陸攻取岳州可否情形臣等議今者賊有
可破之機正宜水陸夾攻但陸路賊備甚嚴應
令舟師先進陸兵繼發茲分撥已定俟戰船器
械整頓完備臣即親統進剿

上允之

臣謹按爾時岳州長沙之賊彼此相恃以為

固若拔取長沙則岳州餉道斷絕孤懸無助
勢難自立如攻克岳州則我兵可以水陸齊
進與大將軍安親王岳樂會兵夾勦長沙亦
不能久存矣

皇上深知地利洞悉賊情故徃者屢

命諸將帥相機規取長岳今復以曠日持久遣色度等

赴岳州

諭將軍大臣以戰守機宜并鼓勸官兵令其爭先用命

於是官兵皆感

恩思奮進戰洞庭徒以將軍鄂爾不善將兵未能破賊
藉口賊踪甚大風濤危險遽爾引還致岳賊
餉道復通又得苟延二載然其後我兵既圍
困逆寇拔取岳州長沙之賊遂不克拒守棄
城敗遁果不出

聖諭所指示云

大將軍康親王傑書奏官兵復興化

時傑書授都統拉哈達寧海將軍印令其統兵
進勦興泉海寇偽總督趙得勝偽虎衛將軍何
祐等擁衆四萬餘於興化城西北太平山屯營
二十六壁壘甚堅正月二十九日我軍進戰先
擊賊於白茅山追至太平山盡破其營賊衆震
懾棄城而遁遂復興化府

已巳停叙進蜀軍功

上諭兵部進蜀官兵並未平定地方大創賊寇且屢奉

溫綸理宜戮力疆場乃至西安布匿名札惑亂衆心
既抵隴州又妄行控告不赴平涼我國家創業以來
寧有是事統兵將領不能約束兵丁肆行不法及至
京師勅令首舉倡告之人官兵又互相隱匿殊干法
紀此行軍功俱不准叙尋議政王等議言據都統赫
業等取到供狀及將軍穆占咨文西安將軍佛
尼勒供詞則官軍棄營敗遁無疑宜將左翼四
旗並陣亡署護軍統領喀西泰部下官兵俱行

拏問

上諭保寧蟠龍山軍營被衝官兵敗遁取供不明地方
未得真實且官兵行役勞苦其免究問至署護軍統
領喀西泰陣亡所部官兵棄將領而逃其未傷官兵
可察拿治罪

癸酉

詔封蒙古貝子達爾扎為貝勒

上諭議政王等固山貝子達爾扎聞定邊花馬池諸處

金史 卷二十八
叛變不待命遣即親率官兵撫定城堡擒獲賊渠深
為可嘉其進封為多羅貝勒

甲戌

詔封蒙古貝勒索諾木為郡王

上諭議政王等多羅貝勒索諾木為國効力應付驛馬
不悞賫奏且提督陳福請兵不待命遣即令其子弟
馳赴深為可嘉其進封為多羅郡王

臣謹按我

國家輯柔遠人靡不綏之以德懷之以禮况蒙古諸部叨恩累世而受我

皇上之寵眷尤為深厚當吳逆之變正其竭力圖報之時達爾扎索諾木咸不待

命遣一則親率官兵進剿叛寇一則遣發子弟馳赴軍前蓋因

天澤霽淪浹於肌髓故感戴至切遂不覺其急於自効雖其勞績可嘉要亦分誼所當為也乃

皇上恩禮愈加特頒異數各晉爵一等於是不維蒙古
益深感激即遐荒絕域亦罔弗聞風嚮化來
享來王總由

聖心至仁惠恤蕃邦備極優渥有以使之然爾

削貝勒洞鄂爵降貝子溫齊等級

上諭議政王等多羅貝勒洞鄂等統率大兵出征秦中
並未能克復疆土撫安百姓貽誤軍機殊負委託可
削去洞鄂多羅貝勒罷議政為閒散宗室降固山貝

子溫齊為輔國公革去都統及宗人府右宗人罷輔
國公綽克託宗人府右宗人停俸二年

平定三逆方畧卷二十八